

**Date – 02/01/2025**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Larsap kal chhuak tur Dr. Hari Babu Kambhampati chuan vawiin hian Aizawl a chhuahsan ang.**
- 2. Kum hlui thlah zan khan hriat theih chinah Mizorama Police station hrang hrangah mi 21 manin hren an ni.**
- 3. Sawrkar laipui Cabinet thutkhawm hmasaber chu loneitute puala ruahman a ni.**
- 4. India Meteorological Department (IMD) chuan kum 2024 kha kum 1901 hnu lama India ram lum ber kum a nih thu a sawi.**



**GOVERNOR**

**Larsap kal chhuak tur Dr. Hari Babu Kambhampati chuan vawiin hian Aizawl a chhuahsan ang.**

**Larsap hi sorkar mi pawimawhte'n an thlah dawn a. Vawiin hian Odhisa khawpui Bhubaneswar thlengin naktukah Bhubaneswar Raj Bhavan-ah thu tiamtirin Odhisa larsap tura lakluh a ni dawn a ni. Hari Babu Kambhampati hian July ni 19, 2021 khan Mizoram larsap hna a chelh tan a, P. S. Sreedharan Pillai a rawn thlak a ni. A hun chhung hian Mizoram hmun hrang hrang a tlawh kual a, Mizoram hmasawna atana rilru leh ngaihtuahna seng tak ni a ngaih a ni a. A bik takin sorkar laipui-in mirethei zawkte khaichhuahna atana ruahmanna a siamte Mizoram a a mamawhte'n hmang tangkai tawk lo leh hre tawk lova a hriat avangin hetiang lam hi thahnemngai takin a tlangaupui thin a ni.**

**Odhisa larsap a ban avangin a aiawhtu atana ruat a ni a. Ani hi Gen. Vijay Kumar Singh chuan a rawn thlak dawn a ni.**



**LUNGLEI CRIME REPORT**

**Nikum January ni 1 atanga December ni 31 thleng khan Lunglei district Police te chuan thubuai 212 ziaklutin kum 2023 chhung khan thubuai 227 an ziaak lut thung.**

Thubuai dang zawng zawngah kum 2023 ai-in 2024 chhung khan thubuai ziahluh a tlem deuh vek a, pawikhawihna langsar zingah nikum leh kumhmasaah tualthah thubuai 1 ve ve ziahluh a ni. Kum hlui khan pawngsual thubuai ziahluh a awm lova, kum 2023-ah 2 ziahluh niin POCSO, 2012 hmangin nikum khan thubuai 7 ziahluh a nih laiin kum 2023-ah 13 ziahluh a ni. IT act hmangin kum hlui-ah thubuai 4 ziak lutin kum 2023-ah thubuai 8 ziahluh a ni. Inrukbo thubuai hi kum hlui-ah 1 ziaklutin kum 2023 khan thubuai 2 ziahluh a ni.

Hetihlai hian ND&PS Act, 1985 hmangin kum hlui-ah thubuai 20 ziahluh niin kum 2023 khan thubuai 10 ziahluh a ni a, hei hian heroin hmang leh zuar a letin an pung tih a tilang niin Police te chuan an sawi a ni.

<><><>

MISHAP

Thawhlejni tlai thim hlim khan Champhai Ruantlang leh Champhai Zotlang inrina kawngpuia bike chesualah mi pakhat a thi.

Kumhlui thlah ni tlai dar 5 leh a chanve vel khan National Highway No.6 ah KTM bike leh Scooty insut avangin Scooty khalhtu Lalhminghlua, Kum 24, Ruantlang khuaa Pi Lalmalsawmi fapa chu a thi. Thu dawnnain a tarlan dan chuan Tv.Lalhminghlua, Ruantlang leh a mi phurh Ninghauvungi (23) Bethel Veng te chu Champhai Zotlang atangin Ruantlang khaw pana Scooty hmanga an kual chhoh dawnah Zokhawthar atanga Champhai pana tlan hawng bike chuan a su a. Scooty a chuang Lalhminghlua leh a mi phurh te hian hliam tuarin Med-Aim Hospital panpui an ni a. Lalhminghlua hi a hliam tuar lovin a boral zui ta a ni. A mi phurh pawhin hliam tuarin Med-Aim Hospital ah enkawl mek a ni a, an insutna kianga lo ding, IGNIS car pawh he chetsualna avang hian a chhe viau a ni.

Tv.Lalhminghlua ruang hi lu men a nih hnuah nimin khan Champhai District Hospital-ah Posmortem Examination tih niin Rualtlangah vui liam nghal a ni.

Hetihlai hian Zokhawthar atanga Champhai pana hawng Bike khalhtu Michael Vanlalvena (19) Bethel Veng, Champhai chuan hliam tenau a tuar a, first aid pek a nih hnuah damdawiin atanga chhuah tir a ni a. A mi phurh Christopher Laltlanthanga Electric Veng, Champhai erawh damdawiin ah enkawl zui mek a ni a, Bike a chuangte hi Police-in hmanraw hmanga enfiahin zu an rui tih an finfiah niin an sawi.

<><><>

NEW YEAR REPORT

Kum hlui thlah zan khan hriat theih chinah Mizorama Police station hrang hrangah mi 21 manin hren an ni.

Tang 21 zingah zu ruih kaihnawihha man belkhawm hi 12 an ni a, tang zinga zaa 57 chuang an ni. Police station 14 leh out post 1 zingah tang awm lohna Police Station 6 a awm. Nimin tlai dar 3:00 atanga tukin dar 7:00 thleng

khan Aizawl Civil Hospital Casualty pan mi 110 an awm a. Mitthi an nei lova. Casualty pantu tam ber chu chetsual vanga hliam, pumna leh luak a ni. An zinga 8 hi damdawiina dahluh an ni a, damdawi-in dang atanga thawn 9 an awm. Lirthei chetsual vanga hliam nei 11 zingah ruh tliak 4 an awm. Kum thar a nau piang hmasa ber ni a hriat chu zanlai pelh hret dar 12.03 khan Durtlang Synod Hospital-ah a piang a, mipa a ni. Hemi hnu lawk dar 12.35 khan Aizawl Civil hospital-ah nau a piang bawk a, mipa tho a ni.

<><><>

#### HOME MINISTER

Home Minister Pu K. Sapdanga chuan, Mizoram mipui za a 80 ai a tam mahin sorkar thupek halpuah leh halmawi khap an zawm chu lawmawm a tih thu a sawi.

Aizawl Police Station-a Akashvani palai-in a kawmna-ah Home Minister chuan Mizoram Sorkar leh tlawmngai pawlte'n kumhlui thlahna atan leh kumthar lawmna atan halpuah leh halmawi hal lo tura mi tinte an ngen thu leh theihtawp an chhuah thu a sawi a. Hemi kawnga nasa taka thawktute hnenah lawmthu sawiin, heti a nih lai a mi tlem te, sorkar thu leh YMA-te ngenna zawm duhlo an awm chu pawl a tih takzet thu a sawi. Pu K. Sapdanga chuan heng halpuah leh hal mawi hal luitute hi sorkar phal loh ti lui an nih avangin a dan ang taka an chungah hremna kenkawh a nih tur thu a sawi. hemi kawngah hian Mizoram police lamin hma an lak nghal thu a sawi a. Kum lo kal tura hunpui lo thleng leh turah pawh halpuah leh halmawi khapna thupek hi Mizoram sorkar chuan a la kalpui zel tur thu a sawi bawk a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

#### CABINET APPROVES CONTINUATION OF PM FASAL BIMA YOJANA, WEATHER-BASED CROP INSURANCE SCHEME

Sawrkar laipui Cabinet chuan loneitute thlai khawbaw thulha zangnadawmna PM Fasal Bima Yojana leh sik leh sain a zir loh vanga thlai seng tlak loh zangnadawmna Restructured Weather Based Crop Insurance Scheme chu kum 2025-26 chhunga hman chhunzawm turin a pawm.

Nimin khan sawrkar laipui cabinet chu an thukhawm a. Hemi zawha New Delhi-a chanchinbu mite a kawmnaah Information and Broadcasting Minister Ashwini Vaishnaw chuan he scheme-a sum ruahman chu cheng Vbch sing 6 sang 9 leh 515-a tihpun a nih thu a sawi.

Minister chuan kum 8 kalta chhunga loneitute hnena an thlai a chhiat vanga zangnadawmna pek zat chu cheng Vbch nuai 1 sing 7 a nih thu a sawi a. Kum 2025-a sawrkar laipui cabinet thutkhawm hmasa ber chu loneitute pual a nih thu a sawi.



**COMMERCIAL LPG PRICES SLASHED BY RS 14.50**

Sumdawnna lama hman thin eirawngbawlna gas bur lian man chu cheng 14 leh duli-a tihhniam a ni.

A man tharah chuan kg 19-a rit, sumdawnngte hman thin gas bur lian man chu Delhi-ah Rs. 1,804 a ni ta a, Mumbai-ah Rs. 1756, Kolkata-ah Rs.1911 a ni a, Chennai-ah chuan Rs.1966 man a ni.

Hetihlai hian, eirawngbawlna gas bur pangngai man chu tihdanglam a ni rih lo. Thlawhna tuialthei hman, Jet fuel/ Aviation Turbine Fuel man chu Delhi-ah za-a 1.5-a tihhniam a ni a, chu chu liter khat zela cheng 1401 leh pawisa 37-a hniam ang a ni.



**2024 THE WARMEST YEAR ON RECORD IN COUNTRY SINCE 1901: IMD**

India Meteorological Department (IMD) chuan kum 2024 kha kum 1901 hnu lama India ram a la lum ber kum niin an chhinchhiah.

IMD Director General Mohapatra chuan kumin January thla pawh hian ram pum deuhthaw-ah khaw vawh ber lai chu a nih dan pangngai aia a lum a beiseiawm thu a sawi. A lum lai ber pawh dan pangngai aia a lum zawk deuh vek a beisei awm thu a sawi bawk.

India ram lai khawthlang lam leh hmar lam chu January thla chhung hian a vawt deuh sawt tura ngaih a ni thung a. India hmar lamah chuan kumin January atanga March thla inkarah dan pangngai aia ruahtui fla tlem zawk tura ngaih a nih thu a sawi bawk.



**RUSSIAN GAS EXPORTS TO EUROPE VIA UKRAINE HALTED AS TRANSIT DEAL EXPIRES**

Russia-in Ukraine kaltlanga tuidawt hmanga Europe rama tuialhthei a thawncchhuah thin chu kum a thar phat atangin tihtawp a ni.

Hetianga tuialhthei kawng tihtawp a nih chhan hi ram pahnihte inremsiamna hun a ral tak vang a ni a. Ukraine kaltlanga tuialhthei Russia-in a thawncchhuah chhonzawmna tur hian Moscow leh Kyiv chuan inremna thar an nei thei ta rih lo a ni.

Russia-in Europe rama tuialhthei a thawncchhuahna kawng upa ber tihtawp a lo nih takah hian kum 10 chhung, kum 2014-a Russia-in Crimea a lak atanga ram pahnih inkungkaihna nghet lo tak chu a lo tawp ta a ni. Kha kum 10 kalta chhung khan Ukraine chuan Russia tuialhthei a lei thin chu a lo titawp tawh a ni.

